



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Maharashtra CM anema jembiba
atema Union minister Narayan Rane puogo

2022 nung Rodrigo Duterte-i
Philippine VP atema tokteptsü

VOL. XVIII NO. 312 (ADOK 312) DIMAPUR RASEMNÜ (WEDNESDAY) LUROI (AUGUST) 25, 2021 ₹ 5.00

COVID-19 Nagaland: Puteter dang nungibo taneptsü angur teimba

Kohima, August 24, 2021 (TYO): Mongulbarnü Nagaland nung COVID-19 agi shiranger nisung 73 taneptsü angu aser 47 dak putet.

"Tesüiba ghonda 24 tsungda nisung 73 tashi taneptsü angu. Parnokji Dimapur nung 26, Kohima nung 19, Mokochung nung 12, Kiphire nung 6, Zunheboto nung 4, Mon nung 3, Peren nung 2 aser Tuensang nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züingsema taneptsü angur ajak agi nisung 27,311 kümogo aser ibaji 92.05% lir, ta pai ashi.

"Mongulbarnü nisung 47 dak COVID-19 aliba putet. Parnokji Dimapur nung 18, Kohima nung 13, Mokochung nung 11, Phek nung 3 aser Mon o Peren nung kaka (1) lir" ta paisa shisem.

Nagaland nung tang COVID-19 puteta anepalur nisung 888 lir. Tanü Dimapur nung COVID-19 puteta alir ka asüba züingsema

tasür ajak agi 611 kümogo, ta Dr Kikon-isa metetdaksü.

Tang tashi nung COVID-19 alitsü akok ta temolung melemi bilemba sample 305,999 tendang. RT-PCR ajanga 105,753, TrueNat ajanga 73,797 aser Rapid Antigen Test ajanga 126,449 tendang, ta Dr Kikon-isa ashi.

"Hombar tashi nung nisung 649,661 nem COVID-19 vaccine indang dose 834,662 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,848, healthcare workers 15,989, arishi küm 45 ser tempur 191,464 aser arishi küm 18 nungi 44 tsungda alir 381,360 lir, ta paisa shisem.

Vaccine agirtem rongnung nisung 185,001-i dose anaprong agiogo. Parnokji frontline workers 43,317, healthcare workers 12,850, arishi küm 45 ser tempur 111,977 aser arishi küm 18 nungi 44 tsungda alir 16,857 lir, ta Dr Thurr-isa metetdaksü.

Covid-19 'breakthrough infection' kanga adoker

Mumbai, August 24, 2021 (Agencies): Covid-19 vaccine

ajanga virus noktangteter saka ano nisung ka 100% kümzüka meyteter. Alima tesem balala nung 'breakthrough infection' ta ajaba osangtem angashir aser iba ajanga coronavirus ya tangbo mesamatsü akok ta nisungtem tsübutstüteper.

Nisung kati vaccine agiba sülen hopta ana lir Covid-19 menaba dang 'breakthrough infection' ta ajar. Ajisüaka, vaccine agiba ajanga nisung ka kanga shirangtsü aliba nungi jenbur.

India nung COVID-19 indang Delta variant ajanga breakthrough infections adokdaksür. Linük nung Covid-19 prokshiba ya Delta variant ajanga lir, ta INSACOG-i metetdaksü.

Indian SARS-CoV-2 Genomic Consortia (INSACOG) ya sorkar indang

laboratory balala lokteper tentetba lir.

Vaccine agiba ajanga COVID-19 menayonga temang nung timtem tulu magütsür aser tasüba nungi kümzüker, ajisüaka coronavirus menatepba azüoktsü atema inyakyim takang beshitsüla aser vaccine agitsüla, ta INSACOG-i metetdaksüogo.

Taoba mapang health ketdangsürtemi vaccine agirtemibo virus mebelenshir ta bilem. Ajisüaka, kanga züba menaba Delta variant adokba sülen U.S. Centers for Disease Control and Prevention-i ashiba agi COVID-19 alirtem indang teni aser trok nung aliba virus tangar dak menadaksür.

US Food and Drug Administration and Centers for Disease Control and Prevention-ibo Covid-19 vaccine agirtem dang dose tasembuba agitsü metetdaksüogo.

Dimapur ayongtem nung lung aser lisem agitetba noktanger



Dimapur, August 24, 2021 (TYO): Dimapur district nung

aliba ayongtem nungi lung aser lisem tanen makai agitetba ajanga iba temeket aser ayong raksatsür ta Deputy Commissioner Rajesh Soundararanjan, IAS-i tanü metetdaksü.

Dimapur nung ayongtem aser iba nung anguba rongsentem wazüka ayutsü, ayong temeket nung aliba yimtsüngtem/colony tem nung zümetsüng timtem aser

apu amala public nungdaktem kümzüka ayutsü atema lung aser lisem agitetba noktanger, ta DC Rajesh Soundararanjan-i ashi.

Iba ya talisa ayong apu/culverts nungi 200 (two hundred) metres tashi nung temolung agütsüsü, ta paisa ashi.

Iba tetuyuba alema inyakertem dak ozüing tapet agi merenshitsu aser machinery/equipments aputsü, ta Dimapur DC-isa metetdaksüogo.

Eastern Nagaland MLA temi Centre ketdangsürtem den ajuruteper



New Delhi nung Eastern Nagaland Legislatures teshimtet teloki NITI Aayog C.E.O. Amitab Kant den ajurutepdang agiba noksa angur.

Dimapur, August 24, 2021 (TYO): Health & Family Welfare

and AYUSH Minister, S. Pangnyu Phom-i anir Eastern Nagaland MLA tem aser DUDA Department ketdangsürtemi New Delhi nung NITI Aayog C.E.O. Amitab Kant den ajuruteper.

Iba mapang Minister Pangnyu aser MLA temi Amitab Kant dang 2018 nung Prime Minister Narendra Modi-i nangzükba osang lemsatper.

Iba mapang PM Modi-i Eastern Nagaland semdangdang special package agütsüsü osang sangoktsü aser iba nung ajemdaker Ministry of Home Affairs lenisüba kübok Multi Disciplinary Committee ka tentet, ta parnoki NITI Aayog C.E.O. dang ashi.

Eastern Nagaland nem special package agütsüsü indang mapatong ka renemer Ministry of DoNER ket nung agütsü saka tanü tashi iba atema sen melemzüksür ta parnokisa

metetdaksü.

NITI Aayog C.E.O. Kant-i Eastern Nagaland MLA tem dang DoNER Ministry nung benoka aliba mapatong atema yariteptsü nangzük.

Iba mapang DRC Wennyei Konyak, OSD Planning Thomas Thailu aser Deputy Director & PRO (IPR) Kuolie Mere nungertem liasü.

ASPIRATIONAL DISTRICT KIPHIRE:

Ano külen, MLA Yangseo Sangtam den MLA aser General Secretary Eastern Nagaland Legislature Union (ENLU) C.L. John nati Mission Director, Aspirational District, Niti Aayog Rakesh Ranjan IPS den Aspirational District, Kiphire atema ajuruteper.

Iba mapang MLA Yangseo-i par constituency nung aliba yimdaklirtemi timtem ajuruba indang osang lemsatper aser Niti Aayog dang terenlok mapatongtem agütsüsü mepishi.

Ministry balala dangi mapatong balala atema osangtem yokogo saka mapatong ka danga magizük ta Yangseo-isa ashi.

Idangji Mission Director Rakesh Ranjan-i MLA Yangseo dang February 2020 nung Asian Development Bank (ADB)-i Educational Sector atema sen crore 3, January 2021 nung terenlok mapa inyaksü atema sen crore 5 aser February 2021 nung infrastructure sector atema sen crore 3 lemezüksüba osang metetdaksü.

"Aspirational District, Kiphire renloktsü atema sen crore 11 tashi lemezüksüogo anungji Deputy Commissioner ajanga temelaba meshitsü shidi zülüang aser iba sülen CEO, Niti Aayog-i agizüka sen agütsüsü" ta Mission Director Rakesh-i MLA Yangseo dang ashi.

Paisa MLA dang tekaratiba nung Deputy Commissioner den online ajanga senden ka amentsü nangzük.

CBI tsungdang MP/MLA tem anema ken o 151 metembang lir

New Delhi, August 24, 2021 (Agencies): India kübok special

CBI court balala nung tang teinyakdak aser taoba MP/MLA tem anema ken o 151 tashi benoka lir. Iba nungi ken o 58 shi ka nungbo aibelenertem taküm tepiyong tepuokdak ayutsü temerenshi angutsüsa lir.

Ajisüaka, ken o asemüsü nungi kasü jungnüa nung tai tongloktsüba kulitem mali saka tatalokbatemjibo küm aika tejakdang atalokba liasü.

2016 küm advocate Ashwini Kumar Upadhyay-i petition ka benokba atema amicus curiae shimba Senior advocate Vijay Hansaria-i Supreme Court nem

iba osang metetdaksüogo.

Upadhyay-i Supreme Court dang tang teinyakdak aser taoba MP/MLA tem anema ken o tem benoka aliba tekaratiba nung angadangsü mepishia liasü. Iba petition nung advocate Sneha Kalita-i pa den yariteper.

Iba petition atema 14 buba report nung "Special Courts, CBI tsungdang ken o 151 mebenteti aliba nungi 58 nungbo aibelenertem taküm piyong tepuokdak ayutsü" ta shia lir.

"Ken o 45 tashi küm aika tejakdang atalokba liasü saka tai tongloktsüba kulitem agüja mali" ta 14 buba report nungsa shia lir. August 19, 2021 nü CBI-ia

Senior advocate Vijay Hansaria nem iba indang osang agütsü.

CBI Special Court tsungdang benoka aliba ken o tejentibaji Patna nung lir aser iba ken o nung tai tonglokja lir anema June 12, 2000 nü charge-sheet agüja liasü.

Taoba aser tang teinyakdak MP 51 dak Prevention of Money Laundering Act, 2002 kübok tai tonglokja lir, ta Enforcement Directorate-ia metetdaksüogo.

[9:29 pm, 24/08/2021] AMONG TYYI: Caption :

New Delhi nung Eastern Nagaland Legislatures teshimtet teloki NITI Aayog C.E.O. Amitab Kant den ajurutepdang agiba noksa angur.

Livingstone Foundation International College semzükogo



Dimapur, Luroi/August 24 (TYO): Dimapur kübok Thahekhu/ Kevijau nung August 24, 2021 nü Livingstone Foundation International College semzüokogo, kong Dr. Apeni Lotha, Director, Dept. Of Higher Education Govt. Of Nagaland dena liasü.

Iba College semzükua nüngshilong ka azingba sülen sentong tatsüka LFI Chapel Hall nung agia liasü, koba Sashirenla Mollier (Dept. Of Psychology) menden sür agi.

Sentong nung College indang anthem atenba sülen Dr. Tainla Mar (Dept. Of Education) ajanga Tsüngrem temoatsü jazüka sarasadem. Maneni Thahekhu Village Baptist Church indang Pastor, Mughabeto K. Zimo-i iba College meshiteta sarasadema liasü.

Dr. R.K Behera, Principal LFIC ajanga sentong nung adener pela agizükba o jembiba mapang College indang tongmelang agi lemsatop aser course agütsüba indang shia liasü.

"Tanü otsü tasen ka yanglur aser iba anogo ya teti bilemtettsü. Tarutsü nükla tajung ka tanü ajemalua

tenzüker," ta Dr. Behera-i ashi. Pai kaketshirtem temelenshi asoshi teti renema alitsü ajungshi aser mapang melenshia aoba den külemi anidaktsü ashi.

Iba sülen Livingstone Foundation International indang mendenpuba, Dr. Andrew Ahoto Sema ajanga sentong nung adener nem souvenirs agüja liasü. Pai Livingstone Foundation International indang otsü tatsüka ashiba mapang, LFI ya 1988 küm kaketshir 52 lir tenzüker aser College jenjangi ajungketba ya Tsüngrem temoatsü lir, ta ashi.

Kaket nung zülua aliba shisatsü kisüng nung masü saka wadang ajak nung meranga inyaker aser azüngser atema education system tajungba nüngdaker, ta pai ashi.

Paisa Nagaland ya shisaliok asoshi tiyong südaktsütsü nüngdak ta ayongzük aser state nung aliba Government aser Private College aser School tem tesendaktep tajung nung senso tajung anitettsü ayongzükua liasü.

Grade XII (Science) nungi Renmmenla ajanga sentong nung temeja ken ka aten aser iba sülen tesemdanger tongti, Dr. Apeni Lotha Director Dept.

of Higher Education Govt. of Nagaland ajanga jembia liasü.

Takok balala anguba aser tuluba akumba atema Dr. Apeni-i Chairman aser School nem tenügsang agüja liasü aser College ya kanga kera aser takok nung aintsü amanger, ta ashi.

Lai kaketshirtem dang iba reju nung shilem ka ama aliba ya tia taka lir, ta shia liasü.

Laisa College Library tajungba kuma yanglushitsü atema tenla agüja liasü.

Livingstone Foundation International ya Thahekhu aser Kevijau tsüngta apu ka amai lir aser ajidang masü Nagaland asoshi nükla tulu aliba reju ka lir, ta Kevijau Village Council chairman ajanga sentong nung ashi aser lenir tajung jenti anitetba atema reju dang pelaba lemsatopa liasü.

Sentong nung All Nagaland College Students' Union tir, Vimeyieko Vitso-ia jembia liasü.

Director, Livingstone Foundation International, Ani Yepthomi-i melepzüng o jembiba mapang faculty temi meranga inyakba asoshi pelaba ashi aser Tsüngrem nem tenügsang agüja liasü.

Social Welfare Directorate ki tasenba semzükogo

Dimapur, Luroi/August 24 (TYO): Advisor Social Welfare, Home Guards & Civil Defence, Noke Wangnao ajanga August 24, 2021 nü NBCC Convention Centre, Phezoucha, Kohima tesülen Social Welfare Department indang Directorate office tasenba semzüktsüogo.

Iba sentong nung jembiba mapang, mapa asangdang kumdaktsüba atema Advisor-i

Chief Minister, Neiphu Rio dang pelaba lemsatop aser iba office building takok ngua renemtetba atema Director aser lar team nema tenügsang agüja liasü.

Noke-i staff tem dang parnok tsüngta tesendaktep tajung ayuba ya jenjang tulu lir ta ashi aser maneni meranga aser ochishia inyaktsü ayongzükua liasü.

Iba sentong nung Wangnao-i

nüngshilong ka sayatsü aser staff tem dang department aser nübur atema tejangraba tulu aser tashi tasen nung inyaktsü ajungshia liasü.

Director, Social Welfare, K. Atoli Sema-i iba sentong nung jembiba mapang, department nem iba ali ya 2008 küm state sorkari lezmüksü aser ki ya 2009 nungi asü tenzüker, ta ashi.

(Maneni page 3 nung...)

Security Forces temi nisung pongu den Burma Teak süng apu



Dimapur, Luroi/August 24 (TYO): Security Forces temi August 22, 2021 nü general area Jharnapani, Dimapur nung nisung pongu den ozüing alema abenba Burma Teak süng CFT 4000 tashi truck ana nung bona Burma Teak süng pua liasü.

Osang tejangja kar nung ajemdaker Security Forces temi nisung pongu den ozüing alema abenba Burma Teak süng CFT 4000 tashi truck ana nung bona Burma Teak süng pua liasü.

Iba dak sendakba ken o maneni bushisüngdangtsü atema pua aliba nisung aser parnok ket nungi ngutetba oset ya Range Forest Officials Dimapur Division, Dimapur nem agütsüogo.

LIC Dimapur Branch lapoktsür

Dimapur, Luroi/August 24 (TYO): Deputy Commissioner & Chairman Soundararajan, IAS ajanga L.I.C Dimapur Branch lapoktsüba osang ka August 24, 2021 nü sangdongogo.

Sorkar totuyuba nung aliba ama mesen tepsetba mozü

akhaba aser COVID-19 tashidak nungi nüburtem kumzükua alitsü mera balala agiba sülen L.I.C Dimapur Branch lapoktsü totuyuba agütsür, ta sangdong ajanga ashi.

Iba Branch shibangtsü asoshi August 20, 2021 nü totuyuba agüja liasü.

Excise puri Dimapur nung temesepba mozü apu

Dimapur, Luroi/August 24 (TYO): Osang ka nung ajemdaker Nokcha A.I.E, Constables Khumeng, Kamnei aser Lady Constable Merela nungeri anir Excise Narcotic Cell indang enforcement duty party ajanga August 23, 2021 anepdang 8:30 ako meta Duncan Bosti, Dimapur anasa Heroin (Sunflower) tuozük gram 45 aser Spasmo Proxycyvoun (SP) tejang 1440 nguteta liasü.

Iba dak sendakba nung Karimganj, Assam nung alir Pasir Uddin'er jabaso arishi küm 28 tain Kajol Ahmed pua NDPS Act 1985 aser Drugs & Cosmetic Act 1940 kübok ken o benokogo.

Tai tonglokja alisang ya Judicial custody dangi yokogo aser ken o ya tang bushisüngdangba mapang lir.



Mangkolemba nung nüburtemi lenmang yanglushi



Dimapur, Luroi/August 24 (TYO): Mokochung district kübok Mangkolemba nung aliba Hokiyong ward ajanga aoba 29th Jangpetkong lemmang kilometre ka tesadang shi kiyong nung aliba nüburtemi yanglushia liasü, ta osang ka ajanga ashi.

Sorkar dak dang metaloker malitsü tangatetba nung yangji aliba nüburtemi pei-pe akokba nung cement, lisem, longsang, stone dusk amshia iba lemmang ya nübu aser rongsen jenti indoka yanglu, ta ashi.

Lemang tamajung nung sorkar jajar masü, anungji nübursa timtem agia mejajatsu

tangatetba nung kwikati lemmang balala ajanga yaritepogo, nenok ajak dang kiyongeri pelar, ta sangdong ka ajanga ashi.

Mangkolemba nung lemmangtem reprangdangra, kanga dang tajemzükba tia nung sorkari yutsüba angur, aser nüburi tesem aisü nung sorkar den yaritepa lenji arudang sorkari züzüa yutsüra nüburi yimyim tulu sorkar anema ayimmesotsü mapang menua mali.

Nübur timtem makai senzusenpong sütetsüsa lemmangtem tajungtiba nung sorkari achayanga yanglutsü mepishir, ta sangdong ajangasa ashi.



Mongulbarnü Union minister of state for power and heavy industries Krishan Pal Gurjar-i Assam kübok Gerukamukh nung NHPC indang Lower Subansiri Hydroelectric Project semdangdang agiba noksa angur. Tanü Krishan Pal Gurjar-i Mohanbari Airport, Dibrugarh nungi indangindanga Gerukamukh-i ao. (Gerukamukh, August 24)

K Sapdanga-i Mizoram working president inyaktsü shim

Aizawl, August 24, 2021 (Agencies): Mizoram nung opposition telok tongtiba Zoram People's Movement (ZPM) vice president K Sapdanga-i tanü party working president inyaktsü shimogo. ZPM indang Val Upa Council (VUC) chairman Lalfakzuala-i Hombarnü Sapdanga shimba osang metetdaksü. Aizawl nung senden amendang Political Affairs Committee (PAC)-i ashiba agi Sapdanga shim. Party president Lalliansawta temang mejungi akümba agi party working chairman ka shimtsüsa aküm ta osang

angazüker. Sapdanga-i party tashi itdaksütsü nangzük aser party züngsemtem dang temaba jenjang nung ajungkettsü atema külemi inyaktsü ayongzük. Sapdanga-isa August 17 nü party lennir aser Tuirial assembly constituency MLA Andrew H Thangliana asüba atema temolung raksaba metetdaksü. Tuirial menden nung by-election agitsü atema osang kecha mali aser MLA mozü kidang teshirangdak alidang sorkari campaign tenzükba atema aitsür, ta paisa ashi. Senden nung ZPM lennir

aser party sitting MLA Lalduhoma-ia ashiba agi, party tejakleni aoer aser party züngsemtem tsüngda telongjem adokogo. "Nüboritem indang sorkar aser inyakyim tasen ka akümtsü atema nüboritemi onok dak tamang akar" ta paisa metetdaksü. Züngsem 40 agi akümba assembly nung ZPM MLA 6 lir. Taküm April ita Serchhip by-election nung Lalduhoma-i ZPM ticket amer takok angu. Ajisüaka, tanünga ZPM MLA temji 2018 küm assembly election 'independent' MLA ama takok ngua liasü.

ACS ketdangsür kati rongsen talila bendenba atema apu



Guwahati, August 24, 2021 (Agencies): Assam Civil Service (ACS) ketdangsür ka ket nung pa dang malangba rongsen aliba atema apu. Chief Minister's Special Vigilance Cell, Assam-i ACS officer Saibar Rahman apu. Rahman-i pa tangutsü dang nungi rongsen teimba bendenba

atema bushisüngdang aser iba sülen pa apu. Saibar Rahman ya Dhubri nung Additional Deputy Commissioner inyakogo aser pai ozüng alema aser ochimashi inyakyim ajanga rongsen benden ta bushitet. Mongulbar anepdang 2:00 ako meta Chief Minister's

Special Vigilance Cell-i Rahman apu. Rahman ket nung Rs 100 crores tema rongsen lir aser ibaji pa mesüra pa kinungtsü ana tenüng nung lir, ta CM's Vigilance Cell nung SP-i ashi. "Pa ya public tenzükur ka lir aser pa dang malangba rongsen benden. Pai rongsen aika angutsüsa mapa inyakba kuli magütsütet" ta SP-isa ashi. Rahman ya Prevention of Corruption (Amendment) Act, 2018 kübok tai tonglokja apu. 23-06-2002 nungi 30-4-2021 tashi nung Rahman mesüra pa indang kinungtsü ana tenüng nung kiojen 89 tashi register süa liasü aser ibaji Rs 100 crores tema indang lir.



Assam kübok Karimganj nung police-i prangpong shibelener ka khaset. Iba nisung ya Nurul Islam ta jangjaogo aser pai police ket nungi prangpong bener jena aotsü merangdang khaset ta police-i ashi. Iba nisung ya Hombarnü Badarpur Police aser BSF sepaitemi Badarpur Bazaar tesem nung apuba liasü. (Silchar, August 24)



Tirapnungyimsüng 80-i telungpur nung saru magütsütsü

Itanagar, August 24, 2021 (Agencies): Arunachal Pradesh nung Tirap district administration kübok yimsüng 80 shi kati telungpur nem saru kecha magütsütsü tenangzükba agiogo. Khonsa nung aliba Assam Rifles indang tesep nung senden ka amendang yimsüng 80 nungi Gaon Burha temi iba tenangzükba agia liasü. Sepaitemi yimdaklir nem nüngdakba security agütsür anungji telungpur nem sen agütsütsü nüngdak madoker ta

Gaon Burha temi ashi. Iba senden nung mendenji 6 Assam Rifles battalion indang Commanding Officer Colonel AK Das liasü aser Tirap district administration nungi police aser ketdangsürtem aden. Tirap district nung yimdaklirtemi ashiba agi telungpurtem parnok indang kiset shiruru bener aoer aser iba jagi shiruru memesüteter. Arunachal Pradesh kübok Tirap, Changlang aser Longjumeit district tem nung Northeast telungpur telok aika lir.

Assam sorkari güntok tezüttem rongdoktsü



Guwahati, August 24, 2021 (Agencies): Assam sorkari güntok tezü bendena aliba rongdoktsü saka iba nung okadak ken o benoka aliba aser scientific nung amshitsübatem madentsü. Assam indang treasury balala nung güntok tezü 2500 shi yua lir, ta Specialist Committee züngsem kati ashi. Iba luden ya Additional Principal Chief Conservator of Forest aser Chief Wildlife Warden MK Yadav-i tentetba liasü. 2010 küm sorkari güntok tezü 1600 tashi raksa endoka liasü saka iba atema environmentalist Dilip

Nath-i ashishitep ken o ka benok. Pai güntok tezü raksa endokba osang nung temolung malem aser iba jagi 2016 küm güntok tezü züngdangtsü atema special committee ka tenteta liasü. Assam nung küm pezü shia güntok tezü züngdang. 2016 nung treasury 12 nung güntok tezü 2,020 bendena liasü. Taküm atema August 18, 2021 nungi güntok tezü azüngtsü tenzükogo. Tang tashi nung güntok tezü 261 tashi jangjaogo. Assam nung güntok 2,640 shi lir aser alima nung Indian one-horn rhino teimba aliba tesemji Assam lir.

Meghalaya nungeri Assam Police post ka amak

Guwahati, August 24, 2021 (Agencies): Assam Chief Minister Himanta Biswa Sarma-i Diphu semdangba sülen anogo ka lir tanü Meghalaya nungi nisung telok kati Umlakher nung Assam police outpost ka amak. Iba ya Assam-Meghalaya arrtsü anasa West Karbi-Anglong district nung lir. Assam Police-i Khasi nunger ka dak tashiyim mapa inyakba sülen Meghalaya nungi nisung noklang aikati Umlakher police outpost amak ta osang angazüker.

Parnoki iba tesem nung Assam police indang bunker ka raksatsü. Iba tatalokba sülen state anaprongi arrtsülen sepaitem mapa lemzüksüogo. Meghalaya-i Assam ali nung tesem 53 atsünga agiogo aser iba nung West Karbi Anglong District nung 40 aser Kamrup District nung 13 lir, ta Assam Chief Minister Himanta Biwa Sarma-i shia liasü. Tang Assam o Meghalaya tsüngda tesem 12 nung mangatettep adoka lir.

Social Welfare...

Maparen balala nung terenlok aliba lenmang ya teti dangbo tajung malir, saka tanübo asenoki süngjang tajung angur, ta Sema-i ashi. Chief Minister-i iba project atema temolung agüja inyakba asoshi lai pelaba lemsatet aser ki renemtsü atema Advisor-i lenmang balala nung nungitba atema pelaba shisema liasü. Commissioner & Secretary, Social Welfare, Sarah R. Ritse-i sentong nung o tatsüka jembiba mapang Advisor-i teti yaritepba atema pelaba lemsatet. Laisa tang aser taoba mapang inyakba officer aser staff, engineer aser sendaktepa alirtem dang pelaba shisem. Mapa tajungtiba nung

(TAPAK 2 NUNGI...) inyaktsü asoshi mapang talangka nungi Department-i ki-o-jen tetemjen ka nüngdaka liasü, ta lai ashi. Ritse-isa officer aser staff tem dang nüburtem asoshi tejangraba tulu nung bendanga agütsür inyaktsü ajungshi. Iba sentong nung Joint Director, Social Welfare, Tosheli Zhimomi menden liasü aser General Secretary, NBCC, Rev. Dr. Zelhou Keyho ajanga Tsüngrem temoatsü meshia sarasadem. Maneni E.E, Social Welfare, K. John Mera ajanga iba ki yangluba indang osang agütsü aser Officer on Special Duty, Social Welfare, Michael Zaren ajanga melepzüng o jembia liasü.



TIR YIMYIM YIMOBILEM (EDITORIAL)

DIMAPUR RASEMNÜ, LUROI (AUGUST) 25, 2021

Lenir taküm aser mapatem bilemtettsüla

Nagaland nung angh inyaktsü atema R.N.Ravi aruba sülenang Nagaland akümertem balaka tushia amshiba kanga jangjar. Pa maru tashibo Nagaland nung yimten maongka aser temoatsü agir shingaia Nagaland akümertem balaka tushiba mangu aser mangashi. Aji oda, R.N.Ravi-ibo Nagaland akümertem tushir saka Nagaland nung alirtemibo amadok ama shingaia parnok tenüng tetetshia metetshir ta asüba agi R.N.Ravi-a tama alitsüa akok. Ano, talisa Nagaland akümertem rongnunga tongti lenir, Naga Peoples' Convention nung tir Dr.Imkongliba Ao sür küm 62 ajungbamong yakanü August 24 nua Nagaland angh, R.N.Ravi-ibo asür bilemteta among saka Nagaland tesem konga kasa anogo nung asür Dr.Imkongliba bilemteta amongba mangashi. Ano, iba jagi balaka R.N.Ravi tamar alitsüa akok. Atangji, Nagaland akümerji pa dang masü saka parnok nisung 14 lir aser parnok 14 rongnunga Aorbo par asem lir. Ajisüaka, Dr.Imkongliba Ao bilemteta amongtsüba kuli tongtibang anaji, ka NPC nung pa tekolak liasü aser ano kuli kaji, parnok ajak rongnung Nagaland akümba mechi pabo pa taküm tenla agütsütsüsa aküm. Iba tenla nungji tanü Nagaland nung nisung aika temoatsü agia arudagi. Atangji, Dr.Imkongliba Aoi anir Nagaland akümertemi pei taküm agi tendanga timtem lendong jenti tizükteta inyakaka, Naga yimten nüchiso bushirtemi memulung nungji Naga yimten aser lokti nung telemsa adok, ashiko, iba jagi Nagaland nung Nagaland akümertem nem parnok dak alang tetushi magütsütetter asütsüa akok. Ajisüaka, tanü lanu asensortemi danga angatettsüba kaji, Nagaland akümertemia Naga nung ajak ashiochtsür parnok kija ajangzüksü aser yimten nung maongka agitsü asoshi bilema Nagaland state aküm masü, saka India sepaitem ket nung Naga nungertem maksüja reshikangshiba ngur, iba tensa nungi Naga nunger kümzüksü asoshi inyakba mapa kaji Nagaland state akümba ya ka liasü. Joko tangbo aginüyonga maginüyonga aser shitaka sang, taia sang, India telongjem kübok Nagaland state kümer küm 60 jungdi asür. Aji oda, küm shia Nagaland state akümba anogo nung dang masü saka India yimten nüchiso anguba anogo nunga Nagaland Chief minister-i anir district headquarters ajak nung yimten yimsüsürtemi oagi India wako atsüketa jembidang, Nagaland state akümba ajanga Nagaland nung alir nübertem maparen tapu aisü nung tejakleni aoba indang nungsa jembiba angashir. Idangji, khenkhen karibo Nagaland akümertem nung sanga jembir. Iba dakji alaka, Nagaland akümertem tushir masü saka Nagaland nung yimten lenir aika Nagaland akümertem aitsüli aser Nagaland nung MLA kümli ta sayuba agi lanurtemang kanga mangmangdaksür. Nagaland akümertemi India government den Nagaland state akümstsü asoshi 16 Point Agreement nung sign asürtem lir. Parnok rongnung ajak pei pei mapang nung teyanglur dangi meyipa omar tang alima nung takümbo Wb.Dr.S.C.Jamir dang lir. Ano, parnok ajak rongnunga Nagaland akümba mechi taküm dena bendanga agütsütsüsa atalokbajibo Wb.Dr.Imkongliba dang lir. Ajisüaka, pa naroküm Mokokchung District Hospital nem tenüng agütsüba dak alaka Nagaland nung pa taküm aser mapa bilemtettsüsa kacha nunga kacha meinyaki lia, Nagaland angh-i yaküm Kohima nung pa alidak kima tesem tesadem ka nung NPC tir Dr.Imkongliba Ao kürakyanglu tajung ka yanglur ayu aser pa alidak Raj Bhavan nunga Dr.Imkongliba Hall ka yanglua, yaküm küm Nagaland state anguba anogo December ka nü semzük. Iba tashiji pi nisung katibo asen nisung asen lenir bilemteta aküm tetushi tulu agüja inyaker saka asenokibo "kanga pelar" ta tebang o ka agi ashitsüa korur ta asüba temulungjang aser tangatetbaji asenoksasa khen bilemdangtsü mapang agi ashir. Dr. Imkongliba dang masü saka NNC nung tongti lenir tanabuba, Number 2, ta akhümketa tetshisang, Imkongmeren tenüng nunga Mokokchung nung football asayadak tesem ka pa naroküm kümdakja tetshiba dak alaka, ashiko asenoki tushia mamshiba agi asütsüa akok, joko Naga nunger yimten nüchiso bushiba otsü jembidang aiben pa tenüngbo tetshia mangashir. Alima yimten latetba otsü nung, asen dang masü saka tangar otsü nunga kenbang obang memedemba otsü agi sünga lir, aji alima yimten yimya, saka yimtenji shir anir par jagi anir aoer, anungji katia katia, pei pei mapang nung tesüba yimten lenirtem mapa aser taküm bilemteta akümstsübutsubaji kanga tongtibang lir. Aji mesüra, tarutsü yimten yimli nung lanu putuia asenok mapa mesükshitsü aser mebiletettsü.

OLEMSABANG

Tershilem ya kong agütsütsü

Lemtila Peter

Ter shilemji Tsüngrem meyong aser ibai achaayangtsüji asoshi arogo teinyaktsü, anungji tershilemji Arogo nem agütsütsüla. Iba dak alak charity mesüra mission mapaji kijai, kibongi, loktii inyaktsü akok, saka tershilem ajanga masü tanungba 90 percent ajanga inyaktsü. - S Wati

Tershilemji kechi?

Ter shilem tetezü, ter nung ka (one-tenth) dang ajar. Ya Tsüngremi moatsüba kechisarena ajak nungi ter nung shilem ka Teyanglur dangi abenba dang ajar. Levi 27: 30 nung yamai zülua lir: "Ali nungi adokba süshia, süngdong süngjang süshia ter nung shilem ka KIBUBA meyong lir." Tetezü ter nung kajibo asen meyong masü, saka Tsüngrem meyong shibai anüng-ali aser alima nung ayazüba ajak yanglu, shiba ajak madak kibur lir (T.Ken 24:1). Laishiba nung iba tershilem ya tongtipang mapa pezü nung amshiba angur: (a) Putir taah agütsütsü (b) Tekülem ki yanglutsü/ yanglushitsü (c) Sensaker yariba, aser (d) Tenyaba mapa inyakba. Tanüa yamaji mulungsoa tenlaba ajanga Tsüngremer wadang ulushidaktsüba nung shilem agir ta angatet.

Ter shilem kechi nung agütsütsüla?

Tsüngrem meyong temeshi terizüngdak koba Khrista temang - Arogo lir kong tanela chiyungtsü angur, aji agi bener arutsüla mesüra agütsütsüla. Tsüngrem Oi ashir, "kü kidang chiyungtsü akatsü asoshi ter shilem ajanga terizüngdak kidangi bener arung..." (Malaki 3:10). Tejen Lai putu nung tenlatem ozüng agi agütsü aser tenlaba nung aibelenertem Tsüngremi merenshi aser rakzükraktemertem rongnung züngsem (Mal 3:8). Taseñ Lai tendak nung Yisu Khrista ajanga iba ozüng tesashiji ageintsüogo, anungji kechi/kongagütsütsüta tasüngdangba nung masü, saka Yisu temeim dak rangloker Khrista temang koba "Arogo" lir, Pa meyong ta indang indanga shia angur. Anungji Arogo ajanga dang ter shilem agütsür ta angatettsüla. Tim tagütsütsü shitak nung magütsüi lira tangatetba nung aibelenen lir ta angatetdi. Tanü reprangdangra kanga tesasatsüka amangbapurtemi aser Arogoia ter shilem abendak tesem aibelenen angatetba angur.

Arogoi aibelenba

Yanglushidi Sabang Sensaksem (YSS) nung iba onük nung lenir aika tebilemba lemsatep aser sansaksem nungi olen kar tarutsü nung bilemdangtsü asoshi lemsateper. Tanü pei yimtsüng Arogo nungi tenüng/züngsem belener oa jila (town) balala tat. agi, Dimapur, Kohima, Mokokchung, etc nung aliba arogotem nung züngsem tajung küma liteper. Saka yimtsüng arogotem nung kodang tenla ki asüba, jubilee amongba mesüra ibala mesükba sentong agidir, ozüng süa yimer senso ajak dang ter shilem saruba, ita ka sen saruba, aji dang masü küm nung ita 3/4 mesüra tesadang kabo pei taso yimtsüng arogoi saruba osanga angashir. Ano khen khenbo arogo tila nung tenzükertemi pei medemer, adianu aser yimerdangi arogo timtem shia ter shilem meshia bener aruba aika ajurur. Na koba arogo nung tanela chiyungtsü chiyunger, iba arogo nungji ter shilemji agütsütsü tim. Jila arogoi yimtsüng arogo, mesüra arogo tila yaritsü tim ta ajitetra, arogo ajanga yaritsüla, saka nübur tanela chiyungba arogo majangi yamaji inyakbaji tim masü. Ashiko, jila kar nungbo yim ka nungi sorkar mapa inyaker noklang pungo nungi meyirjang tashi alitsü akok, item ajakji ozüng süa ter shilemji sarua bener oadokra, pa/la aliba arogo atema tebilemstsü tulu asütsü. Pei yimtsüng aria bilembaji tajung, saka iba jagi pei talidak arogo nung tashi mait maludaktsütsüla.

Ano Arogo aika nung kibong shiai tershilem kwi agütsür list yanglua ajener ita shia alemer anungji Arogo nung kibong shiai kwi agütsür mesüra magütsür shisangdaksür asünung agütsütsüsa akümba ajanga shidakba tangatetba nung masü saka tetoktepa ka ama agütsütepbalir. Ibala tangatetba nung agütsüba ajanga arogo nung khenkhenbo timtem adoktsü akok. Anungji ter shilem shitak agütsüba ajanga Tsüngrem toshidaksür aser Teyanglur Tsüngrem külemer ta tangatetba tajung nüburtem nem angatetdaksütsüla.

Ashiko item tebilemstsütem ya Arogoi tim tesayuba shitak magütsüba tera asütsü akok, kechiaser shitak tangatetba aser tanela tajung nung ranglokeragütsür asü masüar memetet saka aiben tershilem kwi agütsümesüra targeted budget atonger matonger ta nung rangloker bendener, anungji itemyabo Laishiba tesayuba masü ta angatetdi.

Tamangertemi aibelenen inyakbatem kar

Tsüngrem mapa dangji kecha masü, tajung ta bilemer, nüburtemi arogo majangi item mapatem ya inyakba angur:

- Ter shilem kibong kibong, medemer, mesüra adianutem saruteper missionary yokba/yariba.
- Kinungertem/medemer longjemmer theology azünger/makamaiter/sensaker yariba
- Ter shilem bentener mission trip aoba
- Tsüngremi shirang anebtsüji ta ser ter shilem bendener pei-imeimba arogo/lokti balala nung revival katsüba
- Tenüngbo pei arogo nung züluka ayu, saka prayer centre aser para church nung ter shilem agütsüba
- Officer telungjem tenteta ter shilem/tenla bendener missionary yokba
- Arogo majangi, temulunger ter shilem bendener tanga lima nung school, tenla ki sütsüba, ano aika

Item amala inyakba mapaji kanga tajung amai, kechiaser ajakji Tsüngrem mapa dang, tanela anir aruba mapa dang, saka ya Tsüngrem O tesayuba anema lir. Anungji, tanü amangbapur ajaki pei teinyaktsü tim inyaktsü tongtibang kümogo.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Afghanistan nung Khristantemi adianutem dang teyari meshir



August 21, 2021 nü Michigan Capitol nung Afghanistan nungger atema sarasademtsüba sentong agidang tangokba noksa nung angur. Sarasadem sentongji mezüng First Presbyterian Tenla kidang tenzükba sülen Capitol tashi oa idakji sarasadem sentong tembanga liasü.

August 24, 2021: Afghanistan nung Khristantemi alima tesem balala nung Khristantem dang parnok atema sarasademjang aser parnok tenüng nung jembijang ta mepishiogo, ta Mission Network News osang ajanga metetdaksü.

Tang Afghan nungger Khristantem aikati Taliban yimsüsüba kübok parnok ano taliba reshikangshitsü, ta tsüba linük toktsür ajentsü meranger.

US aser NATO sepaitem Afghanistan nungi ainshiba sülen Taliban-i iba linük agiogo aser tang iba linük nung Khristantem densema minorities aikati linük toktsür ajentsü meranger.

Taküm April 13, 2021 nü US-i sepaitem Afghanistan nungi ainshitsü, ta sangdongba sülen tan ita tomle sepa kar dak alaka timbaka iba linük nungi ainshioogo aser taoba hopta Taliban teloki linük yimtiba, Kabul-a agia liasü.

RHIPTO Norwegian Center for Global Analyses-i UN atema renemba osang ka ajanga, Taliban teloki tamalen sorkar den inyaksemeritem anema meinyaksü ta nangzuka

Madhya Pradesh kübok Adnadhini nung Khristan 11 dak azük

August 24, 2021: August 15, 2021 nü Madhya Pradesh nung Badwani district kübok Adnadhini yimda Khristan yimsü anema nokdakertemi Khristan 11 dak azük, ta International Christian Concern osang ajanga metetdaksü.

Yimda yimsüsür tongti leniba nung nisung 200 dak temai Khristan yimsü toktsüsü memelungertem dak azük.

Khristan 11 rongnungji pezübo kanga mejungi yirua hospital kati anir oa treatment agidar, ta kasa osang ajanga metetdaksü.

August 15 nikongdang 4:00 ako nung yimda alir Khristantem ajak senden kati jaok, aser iba tesem nungji lokti tulu ka jelia adenshir liasü. Khristantem iba tesemji tonga aruba mapang nung parnok dang Khristan yimsü tokjang,

liasü saka parnok nangzükba ama meinyaker, ta metetdaksü.

"Tang Taliban teloki nisung aika bushidar aser parnok tsütsülen nungi amokmeren alibaji tejangja," ta toaba hopta RHIPTO Norwegian Center for Global Analyses nung tongti, Christian Nellemann-i metetdakja liasü.

Yamaji Afghanistan nung taoba sorkar den inyaksemeritem aser US sepaitem den külemi inyaksemeritem dang masü saka Khristantemia kasa tia ajangshir. International Christian Concern den jembidang Afghan nungger Khristan lenir kati, "Onoki nisungtem dang kidang nungi tayazük, ta tekümdangtsü metetdaksüogo, kechiyong kimai ayazükertemi lendong ajurutsü," ta metetdaksü.

"Taliban teloki meteta aliba Khristan karbo phone ajanga amokmeren tenzükogo. Parnoki phone ajanga Khristantem dang 'onoki na bushia arutsü' ta ashir," ta Khristan lenirisa metetdaksü.

Tang tashi nungbo ICC-i

mesüra yimda nungi oadokang, ta ashi.

Khristantem jagi Khristan yimsü toktsüsü memelung, anungji lokti jagi parnok dak azük. Iba tatalokba osangji police nem metetdaksü, saka police ketdangsertemi aibelenertem anema ken o benoktsü memelung, ta ICC-i metetdaksü.

Küm 20 tejaklen Adnadhini yimda Khristan kibong 15-i Yisu Khrista agizüka liasü. Parnok Khristan akümba sülen yimda shingai ibaji mashishi saka tawa ka nungi parnok Khristan yimsü anema nokdaker, ta Khristantemi metetdaksü.

Madhya Pradesh nung BJP-i aniba sorkari anti-conversion ozüng tasenba benokba sülen nungi Khristan aser Muslim nungger anema inyakba kanga bulua kümogo.

Afghanistan nung Khristantem tepsetba osang mejangja, ajisüaka Release International otongdar, Andrew Boyd-ibo, Taliban teloki Khristan ka tepsetba onoki jangjaogo, ta metetdaksü.

Osangbener den jembidang Boyd-i, "Taliban teloki phone tem nung Laishiba download süa ali asü maliar mita repranger. Phone nung Laishiba download asüba agi Hazara nungbo Khristan ka tepsetba osang jangjaogo," ta metetdaksü.

Afghanistan nung Khristantem timbaka Islam yimsü toktsürtem lir. Tang iba linük nung Khristan nütsüng 8,000-12,000 shi lir, ajisüaka Khristantem kanga reshikangshiba agi Khristan aikati pei tamangba yimsü mimshir.

China police-i ERCC Arogo mita aoba sülen Khristan 28 apu

August 24, 2021: Amongnü- August 22, 2021 China ketdangsertemi Chengdu nung aliba Early Rain Covenant Church (ERCC) Arogo nung tekülem sentong tagidak mapang nung timtem agütsü aser iba Arogo nung züngsem 28 puogo.

ERCC-i ashiba agi, August 22 anepdang 10:00 ako meta sayutsüngir, Dai Zhichao leniba nung tekülem sentong agiba mapang nung police aru.

Tekülem sentongji 11:00 ako meta tembanga liasü, iba sülen ang panoki police nem kishi lapoktsü. Khristantemi ozüng alema lokti adenshiogo ta police-i aistü. Iba sülen Dai-i police dang kuli kaket meshi saka police-i kuli kecha mesayui tekülem ki telungi ait.

Parnoki adenshia alir ajak osang tejangja züludenba sülen oadok, saka nikongdang 2:00 ako meta Chenghua District Mengzhuiwang office nungi ketdangertem arua Khristan 28 puer ao; parnok

ANOGO ABEN TSÜNGREM DEN

Temulung lemtetba jenjang

"Shiba dak kanga tila nung temulung lemtir, pa dak jenti nunga temulung alemtsü, saka shiba dak kanga tila ka nung temulung lemteta mali, pa dak jenti nunga temulung malemtsü." Luk 16:10

Tanü asen Naga nungger nisung ajak tebang nungi adokba ola kaji "temulung malemba" ya lir.

Lokti tentet balala nung yimsüsür aser lenirtemi nübur majungba agi ta, ano nüburtemi lenirtem aser yimsüsür majungba agi An o Entzü na shiba tambu mekümtet ama kati ka dak temulung malemtep jembiba indang anogoshi osangtsüsang kaketter nunga angur.

Luk 16 nung Yisui nisung tapu ana indang ratetyim ana nung jembiba indang shia angur.

Tekong 10 nung "shiba dak tila nung temulung lemteter, pa dak jenti nunga temulung alemtsü; tetezü shibai pei nem lemsüktsüba mapa tila nung ochi shia nentaka inyaker, pa/la dak tangari temulung alemer aser ibala nisung dakjibo jenti nunga temulung alemtsü, saka shiba dak mapa tila nung mulung lemtettsüsa ochi meshi-i lidir pa/la dak mapa jenti mesüra tulu nunga koda temulung lemtettsü?

Temeim amangbapurtem, asen tenzükba mapa nung tangari temulung lemtettsüsa iba tangatetba nungi marakzüi lidi.

Asen Aori jembiba o ka lir "loktiliba tenzükba nung juli (yangkhu) semer tetenzük".

SARASADEM

Tenzükba mapa nungi ni teti ochi shia nentaka inyaksü tangatetba shisatsü kua. Amen.

rongnung kinü tanur kata chiok. 2019 küm Li densema liasü.

International Christian Concern den jembidang ERCC züngsem kati, police-i parnok puer aoba sülen parnok aika dak azük, ta ashi.

Parnok aika pei pei anepdang 7:00 ako meta district nung aliba police ket nung agütsü saka tesülen Longquanshan nungi police chiokogo. Sayutsüngir Dai arua Li Yingqiang puer ao. Aser pa adianu nabo anogo Police station nung pa dang 14 tashi tepuokdak ayutsü. ghonda tenet asüngdangyaba

2018 küm December ita nung ketdangsertemi ERCC sülen nikongdang 2:00 ako meta chiok.

Arogo mita aoba mapang ICC Regional Manager nungi tenzükba iba Arogo for Southeast Asia, Gina nung lenirtem aser Goh-i, "ERCC anema inyakba ya tang mezüng ataloker masü. Ozüng benokba tenüng amer House ketdangsertemi parnok apur.

2018 küm nunga police Dai pua ita asem tepuokdak ayu aser yaküm November ita nunga police-i pa jaoka asüngdangyago.

August 14 nüa ERCC nungi putir ka pua liasü. Taküm June ita nung China nung ERCC nungi putir kati asüpila sentong ka nung shilem agia adenba atema August 14 nü apuba sülen mezüngshir," ta metetdaksü.

OLONG PAITEP # 5916

1			2					3		
4						5				
					6					
			7							8
		9								
						10				
11					12					
13										

TIPILEN		LANGTSÜNGLEN	
2. Teka mapa tajung	- (8)	1. Anepalua inyak	- (7)
4. Anakshinüba	- (5)	2. Teptsü	- (4)
5. Süoshi agi tazü	- (4)	3. Nok agi raratep	- (6)
9. Aria bilemtep	- (7)	6. Kibong aküm	- (4)
11. Ajemalu ozü	- (4)	7. Nüji masü	- (4)
12. Tzü an	- (5)	8. Taruba küm	- (7)
13. Teben teloktep	- (8)	9. Teka shidok	- (6)
		10. Meputep/Mapet	- (4)

OLONG PAITEP # 5915 TELANGZÜBA

TIPILEN :		LANGTSÜNGLEN :	
1. Yimlibilem, 4. Anak, 5. Tangar,		1. Yongya, 2. Moko, 3. Marok,	
7. Aya, 8. Arong, 11. Par,		5. Teronem, 6. Nung, 8. Amajok,	
13. Lemjem, 14. Oagi, 15. Mulung.		9. Jangzü, 10. belem, 12. Rong.	



ALOKBAI NAGA LIMA MELENSHIBA INDANG TERATET AGÜTSÜR :

- 21st century nungibo Naga limaji yamai alitsü:**
1. Election-i aitsüpurtemji gazetted officer pensioner asütsüla
 2. Nupensor/Yimtisanger asütsüla
 3. Tasütait nisung asütsüla Kechiba yamaji asütsüla?
 1. Pensioner süra pa/la taküm peyong bendener mayimjemba bendentsü chance agütsütsü
 2. Nupensor/yimtisanger seraprangla pa/la dang shingaila complain mesütettsü
 3. Pa/la tasü tait asünung kecha metsübui pa/lai mulungba inyaksü. Kechiba item nüburttem dang shimtsüla? Tanü Nagaland nungbo complaint asürtemjibo Khristan yimya masü ta angatetba agi.

Lilir: I. Jamir

TANÜBO NAI LANGZÜANG

Q. Koba küm "International Day Commemorating the Victims of Acts of Violence Based on Religion or Belief" agizük?

- A.2018 B.2019 C.2020 D.2021

(Taruba adok nung onoki langzüksü)

YASHI ADOK TELANGZÜBA : 2003

AO OSHI ANGAZÜKDAK:

TANÜ ANGAZÜKTSÜBA OJANG



Kotsüa

(v) nüma medangtet, temulung moulutet (could not dare)

* Nisung aikati per dak **kotsüa** mesodakteter.

Kotzü

(n) tebur oset nungi aluba tzü (semen)

* **Kotzü** ajanga tetsür dak tanur benloker.

NAI-A YA METETTER MA?

TAOBA MAPANG AUGUST 25 ANOGO ATALOKBA KAR:

- 1580- 'Battle of Alcantara' - Spain-i Portugal madak takok angu
- 1609 - Venice nung Galileo-i pa indang mezüng telescope sayu.
- 1814 - British sepaitemi Library of Congress raksatsü.
- 1886 - 1buba international polo asayamung ayongzük.
- 1908 - National Association of Colored Nurses tenzük.
- 1912 - China indang nationalist party - Kuomintang ngutet.
- 1926 - Pavlos Koundouris, Greek indang Tir aküm.
- 1948 - Lord's nung Bradman-i minute 212 nung run 150 yanglutet.
- 1950 - Toshiro Mifune aser Machiko Ky? na indang film "Rashomon" saya.
- 1955 - 16th Venice Film Festival: Carl Theodor Dreyer-i direct asüba "Ordet" film ajanga Golden Lion award angu.
- 1960 - Rome, Italy nung 'XVII Summer Olympic Games' tenzük.
- 1971 - 32buba Venice Film Festival tenzük.
- 1975 - Bruce Springsteen indang "Born To Run" kensep saya.
- 2013 - 30th MTV Video Music Awards: Justin Timberlake, Taylor Swift aser Bruno Mars nungeri award angu.

SUDOKU # 5957

TELANGZÜBA # 5958

				1															
6	1		3	9					5										
				4	2	3	1												
		6	7				4												
1		8		3		2													
	5		1	6			9	3											
4																			
3						5	2	4											
5			8	7	4		3	1											

OJANG LUTEP # 5502

- SÜLETENI :
- METSÜYIPBA :
- KDA :
- AKLAA :
- KLETEJANI :
- SÜBAOTO :
- HAKEC :
- LATTIMSÜ :
- LIMA :
- KADÜMOK :

OJANG LUTEP TELANGZÜBA # 5501

POSÜI TSÜK YONG TECHANU YOKDOKBA NGUR
OPERTI SASAA BILEM AMA

TAN HOPTA ATEMA - KOMA SÜLA ?

Q. Tetsür o tetsür na aser tebur o tebur na apuani kümer aliba kibong arogo nung züngsem kümdaktsü nunga koma süla ?



Union Minister Narayan Rane-i Maharashtra CM anema jembiba atema Shiv Sena party worker temi BJP Office nung long agi aonba sülen BJP aser Shiv Sena züngsemtem tsüngda mangatettep adokba noksa nung angur.

India-i Afghanistan nungi nisung 800 anir aruogo

New Delhi, Luroi/August 24 (Agencies):

India-i Mongolbarnü Afghanistan nungi lisopurtem aninba inyakyim nungja ka agütsüogo. External affairs minister S Jaishankar-i iba inyakyim dang 'Operation Devi Shakti' ta aja aser Indian Air Force aser Air India nem parnok inyakyim asoshi tenüngsang agütsü.

"Op Devi Shakti maneni inyakdar. Kabul nungi nisung 78 Dushanbe ajanga anir aruogo. @IAF_MCC, @AirIndia in aser #TeamMEA nem parnok mapa tajung asoshi tenüngsang agütsür," ta Jaishankar-i tweet asü.

India nung 25 densema nisung 78 Mongolbarnü Air India tayimtsü ka nung Tajikistan kübok Dushanbe

nungi New Delhi-i anir aruba sülen pai tweet süa liasü. Nisungtem ya Kabul nungi Indian Air Force (IAF) indang tayimtsü ka nung yashi Dushanbe-i anir ao.

Sikh nung 200 shi Afghanistan nung taolen makai lir. Item nisungtem ya Kabul kübok Karte Parwan gurdwara nung jenoka lir, koba airport anasa lir, ta Indian World Forum tir Puneet Singh Chandhok-i ashi. Iba telok yagi Ministry of External Affairs aser IAF den longjemer nüburtem anintsü merangdar.

Afghanistan nung tensa tamajungba küma oya aliba mapang India-i Hombarnü Sikh nung 75 aninogo.

Taliban-i Afghanistan amokbangba sülen India-i tang tashi nung nisung 800 dak tema aninogo. Afghan Sikh aser Hindu nung 200 shi Afghanistan nung taolen makai lir. Item nisungtem ya Kabul kübok Karte Parwan gurdwara nung jenoka lir, koba airport anasa lir, ta Indian World Forum tir Puneet Singh Chandhok-i ashi. Iba telok yagi Ministry of External Affairs aser IAF den longjemer nüburtem anintsü merangdar.

Taliba yimsüsüba nungi jenbotsü atema linük toktsü jena aotsü asoshi Afghan nung meyirejang aika Kabul airport nung hopta ka shi nongtepdar.

India-i US aser tanga linük aika den sendaktep lisopurtem anintsü asoshi inyaktepa arudar.

West Bengal nung CBI-i ken o bushisüngdang tenzükogo

Kolkata, Luroi/August 24

(Agencies): West Bengal nung election tembangba sülen lendong balala atalokba dak sendakba nung ken o 43 benoka aliba CBI Special Crime Branch-i agizükogo. Ken o tem rongnung tetsür tashiyim agi raksatsüba ken o 29 aser nisung tepsetba ken o 12 densema lir.

Kasa mapang nung Kolkata High Court-i, preliminary report benoktsü atema CBI nem hopta trok latettsüogo.

CBI Eastern Zone, DIG Akhilesh Kumar Singh densema special team pezü tentetogo. DIG Anti-Corruption Branch (ACB) den bendenloksema pa nem Special Crime Branch, Head of Branch khuret nongloktüsügo.

CBI sources ajanga ashiba agi, team pezü yagi ken o balala nung State police nungi FIR tem aser okadak nungi kuli kakettem bendentsü. Parnoki ken o asadangtsü aser ken o ashishirtem aser tenük kuli agütsürtem den sensak asemtsü. Parnoki mezüng CRPC 161 benoktsü aser iba sülen kuli tem mangaoktsü

atema CRPC 164 benoktsü. Ken o den kuli agütsüba meputepbatem den parnoki asadangtsü.

CBI sources-isa ashiba agi, superintendent of police (SPs) temi tang tashi nung ken o tejangja yoker aliba district tem indang ken o CBI-i asadangtsü. State Police aser Police Commissionerate tenüng nungi police ketdangsurtemi parnok tawabanga kübok aliba tesemtem nung election sülen lendong balala atalokba indang osang agütsüogo.

Hombarnü Narkeldanga nung alir BJP activist Biswajit Sarkar dang ken o ashishitsü atema CBI office-i jaokogo. Osang tasen nguogo aser Abhijit Sarkar indang tebou Biswajit Sarkar shiba tepseta liasü, pa indang phone nungi footage agizükogo. Iba tatalokba mapang Biswajit-i, Lalbazar nung amenoker aliba IPS officer kar dangi call süa liasü.

Maneni election tembangba sülen mepetmesü adokba district temi ken o bushitsüngdangtsü atema special CBI team ka yoktsü.



Uttar pradesh sarkari class 6 nungi 8 tashi class tenzüksü temelaba agütsüba sülen Moradabad nung school ka nung kaketshirtem class nung adenba noksa nung angur.

J&K jenjang amenokshitsü bangzüng yanglu

New Delhi, Luroi/August 24 (Agencies):

People's Alliance for Gupkar Declaration (PAGD)-i Mongolbarnü senden ka nung Article 370 aser 35A kübok Jammu and Kashmir aser Ladakh indang constitutional jenjang amenokshitsü atema bangzüng ka yangluogo.

Alliance otongdar aser CPI(M) lenir MY Tarigami-i, senden tembangba sülen bangzüng yangluba indang osang metetdakja liasü.

Iba senden ya alliance mendenbuba aser National Conference lenir Farooq Abdullah'er kidang Gupkar nung 11:00 ako nung agia liasü.

Narendra Modi sorkari 2019 küm August ita agintsüba Jammu and Kashmir indang special

status tanaben amenokshitsü atema PAGD ya political party trok-i kümetetba party ka lir.

Party tekolaktem dak alia iba senden nung party ajak kübok jenjang balala nung lenirtemi shilem agia liasü. Abdullah'er kima osangbenertem den sensaksemba mapang Awami National Conference senior vice president Muzaffar Shah-i, Article 370 benokshitsü atema nokdaksü telemtetba agiba dak alia lokti den tongtepratep sentong ka ayongzüksü atema telemtetba agiogo, ta ashi.

Administration-i senden amentsü atema temelaba magütsü ta osang adokba indang ashishiba mapang, democratic senden ka amentsü atema tenokdangba

magütsütettsü, ta pai ashi.

"Onok democratic senden ka amener aser sorkari onok menokdangtettsü. Onoki tesem ajak nung aliba nüburtem tejangraba aser taginüba jangjatsü asoshi parnok den tongteprateptsü atema sensak asemtsü," ta Shah-i ashi.

Senden magitsüngda alliance lenir kati iba senden ya taoba mapang dang nungi balaka asütsü, ta ashi.

"Iba senden nungbo temaba jenjang nung aliba lenirtem dang masü saka party balala kübok jenjang balala nung aliba lenirtema jaoktsü," ta pai ashi.

Jammu and Kashmir tensa aser ken o balala benoka sensak asemtsü atema iba senden ayongzüük, ta pai ashi.

Maharashtra CM anema jembiba atema Union minister Narayan Rane puogo

New Delhi, Luroi/August 24

(Agencies): Chief minister Uddhav Thackeray anema jembiba atema Union minister Narayan Rane Ratnagiri police-i Maharashtra nung puogo. Rane anema Nashik, Pune aser Mahad nung ken o benoker liasü. Thackeray-i India nüjiso anguba küm amatokba atema pa dak amatsüba indang Rane-i jembiba liasü.

Bharatiya Janata Party (BJP) lenir yagi ashiba agi, August 15 nü state nung aliba nüburtem den jembiba mapang Thackeray-i India nüjiso anguba küm amatok.

Rane-i anticipatory bail meshia ken o benokba angadangtsü atema Bombay high court-i memulungba sülen

mapang tatsüka lir pa apu. Justices S S Shinde aser N J Jamadar nati Rane okatsür Aniket Nikam dang okadak ken o mebenok tsüngda inyakyim shidak benoktsü tetuyuba agütsü.

Rane-i pa anema ken o asem benoka aliba agintsü atema application ka benoka liasü, ajisüaka HC-i ken o mangadang.

Pai iba o jembiba ajanga BJP aser Maharashtra nung sorkar kümteter aliba party Shiv Sena na tsüngda mangatettep tulu adok. Party ana züngsemtem Mumbai aser tanga yimitem nung mangatettep adok. Sena-i, Centre nung Rane mapa agindaktsüner aser pai jembiba olen meyipa agidaktsüner.

(Maneni tapak 9 nung...)



Vice president M. Venkaiah Naidu-i Bengaluru nung Raj Bhavan nung 'Vaccinate India Programme' tenzüksüba mapang tangokba noksa nung angur.



Indonesia nung aliba Afghan refugee temi Jakarta, Indonesia nung UNHCR ketdangsürtem aliba ki kima longkak aitba mapang tangokba noksa nung angur. Taliban teloki par linük tanaben agiba anema aser danga linük kar nung parnok lidaktsütsü takhangba agüja Hazara ethnic kin nungi timba sür adenshia Mongulbarnü longkak aita liasü.

Kabul nung Ukraine nunger tayimtsü ka hijack asü

Kabul, Luroi/August 24 (Agencies): Ukraine nunger anir aotsü atema Afghanistan-i aruba tayimtsü ka Mongolbarnü mejangjaba nisungtemi hijack ser Iran-i anir ao, ta Ukraine indang Deputy Foreign Minister Yevgeny Yenin-i ashi. Ukrainian Minister-isa, iba tayimtsü ya Ukraine nunger anir aotsü melena Iran-i anir ao ta ashi.

"Deobarnü onok indang tayimtsü ka tangari hijack asü. Mongolbarnü iba tayimtsü ya onok ket nungi rakzük aser Ukraine nunger anir aotsü melena mejangjaba nisungtem anir Iran-i ao. Onoki Ukraine nunger anintsü atema asembe

tashi merandang saka tamakok angu, kechiyong ozü nüburtem airport-i motet," ta Ukraine indang Deputy Foreign Minister-isa ashiba Russian News Agency TASS sangdong ka ajanga metetdaksü.

Deputy Foreign Minister-isa, tayimtsü hijack asürtem hadir teperi bener liasü, ta ashi. Ajisüaka pai tayimtsü indang mesera Kiev-i iba tayimtsü meyipa agitsü merangtsü memerangtsü mesera Ukraine nungertem Kabul nungi iba tayimtsü nung mener par linüki ao asü tanga tayimtsü ka nung ao iba indang osang tejangja magütsü.

Yenin-i ashiba ajak agi, Foreign Minister Dmitry Kuleba-i anir hopta tepeyong crash test mode nung maparen balala inyaktepa arudar.

Kasa mapang nung Iran-i iba tayimtsü hijack asüba nung parnok densema mali ta shiogo. "Iba ya yashi 22:00 local/1730Z nung atalok. Tayimtsü ya Mashhad nung totzü inokshitsü atema anen aser iba sülen Kyiv-i apusoa ao. Ukraine nungeri aitsüba ya onoki magizüker," ta Iranian Civil Aviation Organization otongdar Mohammad Hassan Zibakhsh-i ILNA agency dang ashi.

2022 nung Rodrigo Duterte-i Philippine VP atema tokteptsü

Manila, Luroi/August 24 (Agencies): Philippine Tir Rodrigo Duterte-i taruba küm election nung ruling party indang vice president candidate ka ama tokteptsü molungogo, ta PDP-Laban party ajanga ashi.

September 8 nü national assembly amentsü lia Mongulbarnü iba osang ya sangdonger, aser iba assembly mapang PDP-Laban party yagi Senator Christopher "Bong" Go ya 2022 election nung tir atema tokteptsü asoshi nungloktsütsü imlar. Go ya Duterte asoshi teyariteper tajung ka lir.

Ruling party ajanga lemtetba agizükba ajanga Duterte-i bendanga agütsür aser nüburtemi ashiba angur, ta PDP-Laban party indang executive vice president Karlo Nograles-i ashi.

Nograles-i ashiba agi, iba mera ya ajanga administration indang sentongtem tesüiba küm pongu tsüngta inyaka aruba maneni inyaksü, aser yangji ozüng alema temesepba mozü amshiba den raraba dena lir.

Arishi küm 76 tain Duterte-i ibatelemtetba ya Hombar

aonung agi, ta ketdangsür asemi Rappler news website dang ashi.

Tang tir teinyakdak alisang ya ano kümsük talila asoshi tokteptsü ozüng agi memelar, aser pa anemertemi pa ya linük nung menden tematiba jenjang tanabuba nung amentsü meranger, ta ashir.

Meimchir anema mapa tamajung inyakba ken o ka International Criminal Court (ICC) ajanga pa anema benoktsü akok, ta ashir. Duterte yimsüsüba mapang "war on drugs" ta nungja agütsür nisung tepsetba ken o bushisüngdang tenzüksü atema ICC prosecutor temi lenmang bushir. Yimtenren tsütsü tajangzük angutsü mechi tatong tir atema tokteptsü ya Duterte-i July ita sentong ka nung shia liasü.

Duterte-i sentong aika nung pa ya nungnanga tir inyaker aser yimsü asütsü tejangraba mali, ta jembia arur aser pa melen Go ya yokner, ta shia liasü. Pai busemba ajanga 2019 küm Go ya senator akum aser iba mapa den külemi Duterte indang 'personal aide' ka ama inyaka aru.

Saka Mongulbarnü Go-i

sangdong ka nung tir atema tokteptsü tejangraba mali, ta ashi. Go ya tawa linük sema senzüba ajanga pa sentong indang nüburtemi tali jembir.

Go-i maneni Senate nung pa mapa nung rangloktsü, ta ashi.

Kasa mapang Duterte'er jala aser Davao City Mayor Sara Duterte-Carpio-ia linük tir atema tokteptsü bilemer ta shia lir. Anungji tebu aser jala tir atema tokteptsü amai ajiteter, saka la ya tebu indang party nungi masü.

PDP-Laban telok ya ana kuma sadanger ka Duterte kübok aser ka alimai meteta boxing asayar aser Senator Manny Pacquiao kübok lir.

Pacquiao shiba Honibar aonung US kübok Las Vegas nung boxing match ka asayaba nung tamakok ajuru, pa tir atema tokteptsü asadanga mapang lir.

Tesü tashi pa Duterte den sendaktepa liasü, saka tir nungi pila ao aser China den mangatetep aliba South China Sea ketdangsüba aitsü aser tashidak wara agi tesem ajunga sünger lia health department nung ochimashi mapa inyaker, ta tai tonglokja lir.

Al Shabaab telungpurtemi Somali military base ka amak

Mogadishu, Luroi/August 24 (Agencies): Al Shabaab telungpurtemi Mongolbarnü central Somalia nung military base ka amak aser iba anasa aliba jila ka atsüngogo.

Galmudug tesem kübok Amara tesem nung alirtem ashiba agi, al Shabaab telungpurtemi government special force units dak rangloker pei temang nung bomb alenoker pokdaksür ka yoka bomb pokdaksüba sülen anepdang raratep tenzü.

Amara ya kanga tongtibang jila ka lir, koba al Shabaab puri amokbanger aliba tzüküm nung aliba jila Harardheere-i aolen lir. Harardheere ya 2011 küm shishilebartem indang rong kanga bulua amakba mapang tzüyim nung rakzüraktemtem tamendakdak liasü.

"Al Shabaab telungpurtemi tanep Amara nung sorkar base ka makogo. Sorkar sepai aser talisa Dana aser Galmudug indang Darawish iba tesem nungi atsüngin aser al Shabaab-i iba tesem temeket amokbang," ta Amara nung alir Farah Osman-i Reuters dang phone ajanga ashi.

"Al Shabaab telungpurtemi Amara nung military base ka amak aser jila amokbangba den

armoured vehicles 11 rakzük aser ibala mesükba gari tenet rongtoktsüba sülen noksa tangoka liasü," ta Amara nung alir Ismail Nur-i ashi.

Ajisüaka Amara nung alirtem nisung asüba indang osang tejangja magütsü.

Al Shabaab indang Radio Andalus-i broadcast ka ajanga parnok iba base amak aser jila atsüngogo ta ashiba den gari 14 aser prangbong amenoker senzüba pick up trucks 10 puogo, ta ashi.

Iba ita tetenzüklen Galmudug tesem nung amenoker aliba sorkar sepaitemi Amara amokbang, koba al Shabaab tazüokba kübok taoba küm 10 tashi liasü.

Iba mapang Baadweyn densema tanga yimtsüngtem aika al Shabaab ket nungi meyipa agi.

Al Qaeda den sendaktepa aliba al Shabaab telungpurtem yagi Somalia central government den mapangshia rara mena arudar. Parnoki sorkar atsüngtoka Islamic law tesashi benoktsü meranger.

Parnoki Somali military base tem aser hotel, bar aser school tem amala civilian infrastructure tem Somalia aser kidanger linüktem nung maka arudar.

Beijing-i South China Sea nung amokmerener: Kamala Harris

Singapore, Luroi/August 24 (Agencies): United States indang Tatong Tir, Kamala Harris-i South East Asia linüktem semdanga jajaba mapang Singapore nung sentong ka nung o jembidang China aija liasü.

Beijing-i South China Sea nung tashiyim amshia aser amokmerena mapa inyaker, ta Harris-i ashi, kong küm aika mangatetep adoka arur.

Timtem ajuruba mapang US-i külem tembartem den nokdaksü, ta lai ashi.

Lai ken o aika nung kongshia jembib aser Afghanistan nungi US sepaitem ainshitsü telemtetba agiba ya tasü tait aser tim mapa lir, ta ashi.

China-i amokmerena aser rara mesüa South China Sea tuluba nung kibur akumer, ta Harris-i ashi.

"Ozüng alema kibur kuma jembiba ya 2016 arbitral tribunal telemtetba nung magizüker aser Beijing inyakyim agi maneni

linük balala indang temeden amokmerentsür," ta lai ashi.

China-i South China Sea agiyonga aruba mechi ken o benoka jembiba nung Philippines-i takok anguba athishia lai jembia liasü. Tribunal ajanga obendang agüjaka 2012 küm nungi iba tzüyim nung Chinese Coastguard tem teti arua alir aser Philippines angopurtem merenshir.

China-i iba tesem ya küm noklang aika nungi par meyong temeden lir, ta ashir aser yangji mitkar alitsü atema ki-o-jen arrsanga yanglur.

Japan densema linük aikati iba tzüyim nung asetkong tila kar nung kibur akumer.

South East Asia region nung South China Sea indang ken o ya kanga tulu lir, aser Harris iba region nung arua liaka lar linük arrsanga Afghanistan nungi ainshiba onük nun gang nüburtemi temolung agütsür, koba August 31 tashinung tembangtsü lir.



Waverly, Tennessee nung tzümetsüng agi raksatsür aliba ki ka nung tetsür tain ka osettsüset bushiba noksa nung angur. Anogo ka tejangdang Middle Tennessee nung tzünglu kanga sashia arua tzümetsüng adokba sülen nisung aika süogo, kar samar bushir aser ki raksatsüba den lenmang aika metsüngzüka ogo.

State Level Monitoring team-i Longleng semdang



Longleng, Luroi/August 24, 2021: Commissioner & Secretary, Geology & Mining, K. Libanthung Lotha, IAS aser Joint Director, H&FW, Lhovizotuo Belho nati anir State Level monitoring Team on Covid-19-i Longleng semdangba mapang tangokba noksa ka yangi angur.

Longleng, Luroi/August 24, 2021 (TYO): Hombarnü, Commissioner & Secretary, Geology & Mining, K. Libanthung Lotha, IAS den Joint Director, H&FW, Lhovizotuo Belho nati anir State Level monitoring Team on Covid-19-i Longleng semdang aser DC conference hall nung DTF Longleng den seden ka amen, ta sangdong ajanga metetdaksü.

Iba senden nung Deputy Commissioner & Chairman DTF Longleng M. Shayung Phom, NCS menden liasü aser pai ketdangsurtem dang district nung Covid-19 tensa indang osang agütsü.

K.Libanthung Lotha-i, DTF, Longleng indang maparen/inyakyim pelashishia agizük aser Covid-19 anema raraba mapatong nung maneni tasüita inyaksü asoshi pai DTF pur ajungshiogo.

Pai, district indang NGOs balalai shilem agiba indang tongtibangtem metetdaksü aser Covid-19 tasembuba wave agi meneptsü asüa, DTF puri tekümdangtsü meratem tali

akangshitsü aser sentong tem renemtsü asoshi mepishia liasü.

District nung vaccine shilem 100% ayimjema (temsüa alirtem) agütsütsü aser akok tashi Covid-19 tendangba maparen ulushitsütsü nüngdakba indang nung pai jembia liasü.

Lhovizotuo Belho-i, DTF pur den sensaksemtsü aser Covid-19 dak sendakba timtem/metokmeperiba aser tebilemba tem angadangtsü nükjidong nung State Level monitoring Team on Covid-19-i Longleng semdangtsü lemtet, ta ashi.

Covid-19 dak sendakba maparen nung, State Sorkari district nung NGOs aser DTF tem yaritsü asoshi renema dang lir, ta pai metetdaksü.

DPO (RHC & UIP), Dr. S. Imnameren-i, yimtsüng trok Amosen, Chingong, Mongkhong, Shamshangching, Tangha aser Yongnyah; aser item yimtsüng den külemi Department, DEF Longleng nung vaccine noklang shilem ayimjema agütsüjemogo, ta telok dang metetdaksü.

Covid-19 vaccine agütsü aser

Covid-19 test drive atema, Medical Department den Arogotem longjemer Deobar anogo vaccination drive ayongzüksü aser iba mapatong asoshi lennir balala dang yakpang ser inyaksü ajungmesotsü nükjidong nung asalentongtem atongtetta inyakdar, ta pai metetdaksü.

Kasa senden nung, ADC Longleng, D. Robin; Phomla Hoichem nungi teshimtet nübu, H. Shamthai; Executive Secretary PBCA, Tialemba aser CMO Longleng, Dr. Obangjungla nungeri jembio.

Maneni, iba senden magidang, monitoring team-i CHC Yachem aser Yaongyimchen yimtsüng semdang aser village task force den sensaksema liasü.

Iba senden temer sülen, monitoring team den DTF-i Covid Hospital aser Longleng district hospital semdang aser parnoki MS & CMO den Medical ketdangsurtem den sensaksemogo aser team-i ano Namching Health & Wellness Center semdanga liasü, ta kasa sangdong nung shia lir.

BJP Mokokchung-i F&CS den senden ka amen



Mokokchung, Luroi/August 24, 2021 (TYO): Mokokchung District nung Pradhan Mantri Garib Kalyan Anna Yojana (PM-GKAY) scheme

süsümedema mapa küma inyaksü asoshi, Mongolbarnü (24.08.2021) BJP, Mokokchung District indang ketdangsurtemi Department of Food & Civil Supplies, Mokokchung, ADS, N. Jamonger Ao den senden ka menogo, ta BJP, Mokokchung District, president, Imolemba Jamir-i metetdaksü.

PM-GKAY ya Ato Kilonser, Narendra Modi-i March 2020 nung sangdongba 'food security welfare' scheme ka lir. Tanga tesem nungi arurtem aser sensakertem nem jang-o-tsü anagati agütsütsü atema 'Atmanirbhar Bharat' indang

shilem ama PM-GKAY ya mapatong ka lir. May nungi November 2021 tsüingda, iba scheme ajanga nisung cr. 81.35 dak tema ajangzüksütsü.

Alima ajunga asüingba COVID-19 wara mapang, timtemer nem teyari agütsüba atema, iba seden nung, BJP, Mokokchung District President, Imolemba Jamir-i, F&CS indang Department nem tenüngsang agütsü.

Mokokchung nung, F&CS ajanga jang-o-tsü tem lema agütsüba maparen indang tebilemstü lira, yimtsüng nung putu menden aser ward nung tekolakpurtemi item jang-o-tsü alemba maparen tarensen agi inyakdar, ta pai ajitetba ka lemsatet.

Iba ama mapa tajung

maneni inyaksü asoshi pai F&CS indang Department ajungshi aser nübortem ajangzüksütsü asoshi BJP, Mokokchung district-i akok tashi yaritsü, ta pai nangzük.

Department den ajurutebpa atema F&CS, Mokokchung ADS, N. Jamonger Ao-i, BJP, Mokokchung district dang pelaba lemsatetpa mapang, pai party ketdangsurtem dang outlet balala ajanga jang-o-tsü alemba maparen nung department indang inyakyimtem tongmelang agi rasa ashi.

Sr. Inspector, F&CS, Mokokchung, Allen Imchen-ia, district kübok tesem balala nung Department-i PM-GKAY scheme achaayanga inyakba indang lemsatet. Ajiasünungang, iba Central Scheme ajanga kilen shia ajangzüksütsü.

BJP, Mokokchung District-i, mandal balala nung karyakartas ajak dang akok tashi F&CS indang ketdangsurtem, village council tem, ward tekolakpurtem aser tajangzük angutsüpur tem yaritsü asoshi tetuyuba agütsüogo. Ajiasünungang, lokti nung PM-GKAY scheme ajanga ajak ajangzüksütsü.

MULUNGNIEN O

"Kechiaser ni asoshi taküm alibaji Khrista, aser tasütsüji tajangzük lir". Filipi 1: 21



ASÜ: 14/08/2021

Asür Imsangba Jamir Longjemdang, shiranga aliba mapang nungi tasünü tashi kija, lokti aser kibong, kwikati temeim nung aria bilema nübu, rongsen aser tamang sarasadem agi ozü den yaritepogo, ajak dang kangasa pelar. Nenok mapa tajung asoshi ozüi meyipa agütsütsü kecha maka, saka asen Tsüngrem taküm alisangi nenok ajak moajang ta ozü sarasadem.

~ Tedi tenu, anükapang aser kinungertem.



Office of the
Watsü Mungdang

Headquater: Mokokchung - 798601 : Nagaland
Regd. EDS/70/84-85 Dated 08-04-1986
E-mail: Watsü.mungdang@gmail.com

METETDAKTSÜR

22 buba Watsü Imti Mungdang koba 23rd April 2021 nü akatsü aliba thinena liasü, ibaji 27th Aug 2021, 10:00 Ako nungi tenzüka Town Hall nung alitsü. Anungji tejaokertem ajak iba anogo mapang shitak nung arua atentsü mepishia metetdaksür.

Mungdangi arurtem atema temetetsü:

Tesenteper ajak Unlock-5 SOP-i melaba ama telen shia nungi nisungtem shimer arudaktsüner.

Sd/-
Wt. Maongienla
President

Sd/-
Wt. Moanaro
Secretary

NDPP Youth Organization-i senden ka ayongzük

Mon, Luroi/August 24, 2021 (TYO): State nung Advisor Imnatiba-i, lanurtem mapa mangur lanurtem sorkar mapa nung anioktsü asoshi kanga dang tasak kümogo (tawa tanü sorkar mapa angutsü tasak akümba). Anungji, sorkar mapa nung dang merangloki, rongsen lenmang bushitsü asoshi pei pei sasa inyakteta alitsü nüngdaker, ta ashi.

shisadokten senden ka ayonga agiogo, ta NDPP Youth Org-i sangdong ka ajanga metetdaksü.

Iba senden nung, alakteta tejaoker ama, Imnatiba Jamir, MLA & Advisor, (Labour & Employment, Skill Development & Entrepreneurship), shiba NDPP Youth Org, Nagaland indang Legislator in-Charge lir,

pa dena liasü. Lanur aika tebilemstü kecha mekai aser mapa kecha meinyaki dang kazüdaki, ta pai ashi. Pei pei district nung, kisü-jensü maparen wadang tsütsü telok tentetsü asoshi Civil & Electrical Engineer tem teyari agitsü asoshi Advisor-i lanurtem ajungshia liasü, ta kasa sangdong nung shia lir.

Maharashtra CM anema... (Tapak 7nungi...)

"Narayan Rane-i Shiv Sena züngsemtem rongmeso. Pai jembiba o meyipa agitsüla aser pai meyipa magira tatalokbatem ajak pa khuret asütsü," ta Shiv Sena legislator state home minister, Shambhuraj Desai-i ashi.

Sena pusemertemi Nashik nung amenoka aliba BJP indang office long agi onsatsü.

Congress aser Shiv Sena den külemi Maharashtra Vikhas Aghadi (MVA) sorkar kübok aliba Nationalist Congress Party (NCP)-ia Rana-i jembiba o ya mezüingmeshi o ka ta shiogo.

"Union minister Narayan

Rane-i CM Uddhav Thackeray anema jembiba o ajanga CM dang masü saka Maharastra nung aliba nübortem ajak mezüingmeshiogo. Iba ya magizüksü. Nisung shinga ozüing tema nung mali aser kechi jenjang nung lidir liaka merenshitsüla," ta NCP lenir Nawab Malik-i ashi.

Kasa mapang nung taoba Maharashtra chief minister aser BJP lenir Devendra Fadnavis-i ashiba agi, par party-i Rane-i jembiba o pumasemer, saka pa anema inyakba maparen anemabo parnoki nokdaksü ta ashi.

Serie A: AC Milan-i Sampdoria kokogo



Genoa, Luroi/August 24, 2021: Luigi Ferraris Stadium, Genoa nung AC Milan aser Sampdoria na Serie A asayaba mapang, Milan atema Brahim Diaz-i goal idaktsür sülen pelaba yangi noksa nung angur.

Genoa, Luroi/August 24, 2021 (Agencies): Serie A football asayamung nung AC Milan aser Sampdoria na asaya liasü. Tan season nung iba game AC Milan pur indang mezüing asaya asütsü aser Brahim Diaz-i Milan atema goal ka idakja, par teloki goal 1-0 agi Sampdoria koktet.

Taruba season ana atema, Real Madrid nungi loan nung Diaz Milan nung tanaben asayar asütsü aser iba asaya tenzüker minute 9buba nung Milan atema pai mezüing goal idaktsü.

Mezüing half nung, telok anapronglai goal idaktsütsü maongka angu, saka Sampdoria pur nem memenepdaktsütsü

atema, Milan indang goalkeeper tasen Mike Maignan-i kanga dang junga Sampdoria pur goal nokdangteta asaya.

Asaya tatemlen, Milan-i alizükba asayar - Olivier Giroud-i goal ana idaktsütsü maongka angu, saka Diaz indang goal ka ajanga Stefano Pioli'er teloki point 3 shi ngutet.

Tang, Milan-i Sampdoria madak takok anguba densema, tanga tesem nung ayongba Serie A game 11 tashi nung par teloki takok angur asütsü.

"Onok ajaki junga asayaogo ta bilemer aser iba ama tanela nung asayaba ya kanga dang shitak. Teti nunga tanga team dang nungi iba team-i balaka asayar. Iba ama telongjem

tanela nung asayara onoki temaba jenjang ajangzükttetsü. Milan indang jersey no.10 semer asayatsü asoshi ni metsübur," ta Diaz-i ashi.

Honibarnü, taoba Serie A asayamung takok angur telok Inter Milan-i goal 4-0 agi Genoa kokogo. Küm 10 nung AC Milan-i mezüing 'Scudetto' (takok marok) angutsü temulungtetba nung shilem agidar aser iba mangdang ataloktsü asoshi parnoki kanga meranga asayatsüla.

Zlatan Ibrahimovic temekok yirur aliba ajanga AC Milan pur mezüing asaya nung pai shilem magitet, saka Milan coach Pioli-i Chelsea nungi striker tejen Giroud anioka liasü.

Pakistan aser Afghanistan ODI series atsülanger

New Delhi, Luroi/August 24, 2021 (Agencies): Afghanistan aser Pakistan na tsüingda asayatsü aliba ODI series atema anogo atsülangtsüogo, ta Pakistan Cricket Board (PCB)-i sangdong ajanga metetdaktsü.

September tetenzüklen, Sri Lanka nung iba ODI series asayatsü renem, saka Afghanistan sorkar laoba aser Taliban telok ajanga iba linük agiba sülen, Afghanistan Cricket Board-i iba series atsülangtsü mepishiogo, ta PCB-i ashi.

PCB-i, Afghanistan nungi asayatem senzisenbongtsü timtem ajuruba, Sri Lanka nung Covid-19 wara süshia maoba aser asayatem (Afghanistan cricket asayatem) shisabulu tia ka nung aliba asadangteta, iba ODI series atsülangtsüsa akümer, ta metetdaktsü.

"Asayatem shisabulu tensa ajangshiba, Kabul nung tayimtsü senzütsü asoshi timtem adokba aser tanga

timtem ajanga, Afghanistan Board-i taruba ita indang ODI series atsülangtsü asoshi mepishiba Pakistan-i agizükogo," ta Pakistan Cricket Board-i ashi.

Afghanistan indang home series, koba Sri Lankan kübok Hambantota nung ayongzüktsü renemer liasü, saka iba yimti nung Covid-19 puteter timba kuma aoba asadangteta, iba series asayatsü asoshi tetsükdaktsü adoker. Honibarnü nungi tenzüka Hambantota nung anogo 10 lockdown akatsü asoshi sangdongogo.

"Broadcast facility nunga timtem adoka liasü, koba tetsükdaktsü tuluka asütsü aser board anapronglai iba series 2022 küm ayongzüktsü asoshi sentong yanglutsü," ta sangdong ajanga metetdaktsü.

Aruya aliba ODI series atema, Afghanistan cricket team-i lenmang ajanga Pakistan-i aotsü aser Dubai ajanga Sri Lanka-i aotsü asoshi renem.

Cricket Board anapronglai iba series 2022 küm ayongzüktsü asoshi sentong yanglutsü, ta PCB-i shisem.

Asaya asem ODI series ya "One-day Super League" indang shilem ka liasü, koba India nung 2023 World Cup (50 overs) atema qualification asayamung ka asütsü.

USA aser NATO forces temi Afghanistan toktsüba den shimteta aliba sorkar (Afghanistan) laoba sülen, Taliban-i iba linük agir külen nungi Kabul nung tayimtsü senzütsü asoshi timtem adoka liasü.

Afghanistan-i iba series Pakistan nung ayongzüktsü asoshi merangdang, saka lenmang madok aser item timtem asadangteta, Board anapronglai iba series atsülangtsü asoshi lemtet.

Taoba ita (July) Afghanistan-i iba series atema nungtugu leg-spinner Rashid Khan densema züngsem 17 squad ka sangdongogo.

Bajrang Punia-i Wrestling World Championships nung masayatsü

New Delhi, Luroi/August 24, 2021 (Agencies): Olympic nung bronze medal angur Bajrang Punia-i Wrestling World Championships nung masayatsü, koba October ita iba asayamung ayongzüktsü terenemba lir. Tokyo Games metenzükdang asayamung ka nung Bajrang yiruba ajanga hopta trok tashi temang anepalutsü (rehabilitation) asoshi health takotet temi teyuba sülen, pai Wrestling asayamung nung shilem magitettsüsa akümer.

Russia nung Ali Aliev Tournament nung shilem agiba mapang Bajrang yirua liasü aser iba timtem ajanga pai match ka masayatet. Rehabilitation matem tashi, Bajrang training magitsü. Wrestling World Championships ya Oslo, Norway nung October 2 nungi 10, 2021 tashi asayatsü terenemba lir.

Bajrang-i pa temang nung timtem aliba metettsü asoshi tawa pai MRI scan agi aser iba timtem atema pai Dr. Dinshaw Pardiwala den jembiogo. Mumbai indang Kokilaben Dhirubhai Ambani Hospital nung Dr. Dinshaw ya Centre for Sports Medicine nung tekolak lir, ta PTI sangdong ajanga metetdaktsü.

"Teret teloktep nung tezü raksar aliba ngutet aser Dr. Dinshaw ajanga hopta trok shi temang anepalua amungtsü

asoshi kü dang shiogo. Ibayongji, World Championship nung ni masayatetsü," ta Bajrang-i ashi.

"Taküm küm atema World Championships ya asayamung tonngtibangtiba ka liasü. Iba timtem ajanga tan season nung ni tanga asayamung kecha nunga shilem magitettsüsa kümogo," ta pai shisem.

"Olympics (Tokyo Games) nung mezüing shilem agitsü maongka tulu angu aser iba den külemi Olympic medal ka angutsü mangdang tulu liasü. Ibayongji, timtem liaka, Tokyo Games nung shilem agiogo," ta Bajrang-i ashi.

"Sonepat nung kü sasa temang anepalua mungdar. Dr. Dinshaw-i exercise yimya ka teyua lir aser anogoshia gym nung item exercise agidar. Iba den külemi, rehab mapang 'mat-training'-a agitsü," ta pai ashi.

Arishi küm 27 tain Bajrang-i pa indang coach, Georgia nung Shako Bentinidis teyari aser shisatsü maneni aginüba lemsatepogo. Tang, Wrestling Federation of India (WFI) ajanga Shako nem contract tasen agütsütsü lir aser aji masüding Shako pa talidaki orr lir.

Contract tasen asoshi telemtetba ka magütsüding, India nung wrestler atema shimteta aliba bendager coach tem asoshi telanzüba/tebilemba agütsütsü atema WFI-i wrestler tem den senden ka amentsü.

Premier League: West Ham-i goal 4-1 agi Leicester kokogo

London, Luroi/August 24, 2021 (Agencies): Hombarnü Premier League asaya nung West Ham-i Leicester madak goal 4-1 agi takok nguogo. West Ham atema Michail Antonio-i goal ana idakja liasü.

London Stadium nung iba asaya tenzüker, David Moyes'er telok nungi Pablo Fornals ajanga minute 26buba nung mezüing goal idaktsü. West Ham pur goal 1-0 agi tejakdang ser asayaba mapang, mezüing half atongtsü lia, Leicester nungi Ayoze Perez-i Fornals dak ajemoktsüba ajanga minute 40 buba nung pa (red card) asaya nungi tukudaktsü.

Break sülen, tanabuba half nung, Leicester atema Yuri Tielemans-i goal ka (minute 69buba) meinoktsüding, Said Benrahma-i West Ham indang goal tanabuba idaktsü.

Premier League putiotsü nung, West Ham atema Antonio-i goal timtiba (49) idaktsür asütsü. West Ham aser Leicester na asaya metenzükdang, Antonio aser Paolo Di Canio na indang indang goal record (goal 47) kasa shi liasü.

Asaya tatemlen, arishi küm 31 tain Antonio-i minute 80buba aser

84buba nung goal ana tashi idakja pai West Ham nung otsü tasen yangluogo. Taoba hopta, West Ham-i Newcastle madak goal 4-2 agi takok ngua lir.

"Pai (Antonio) alizüing tasen ka tongtetba ngua pelasetet. Mezüing half nung pai junga masaya aser aji ngua ni kanga tezütanga liasü, ajisüaka, half time nung ashiba ama pai mapa kuma inyak," ta Moyes-i ashi.

Premier League asayamung nung, West Ham puri mezüing asaya ana tashi atonga takok anguba ya tanabenbuba ang asütsü. "Iba asaya aonung kodanga mamatettsü. Team-i kanga junga asayaogo. Parnok (Leicester) nungi asayar ka tukudaktsüba ajanga asaya yimya tera melenshiadok, saka onoki lenla aika nung junga asayaogo," ta Moyes-i ashi.

"Champions League nung asayatsü asoshi jenjang ka ajangzükttetsü atema, asayatem dang point talila bendenloktsü asoshi parnok ayongzük. Parnok nem khuret tuluka bendenloktsür ama, saka relegation nung madentsü atema parnok ajungmesotsüla," ta Moyes-i shisem.

BILEMDANGANG

"Pei dak dang temulungtetba lirbo, tatidang jenti agi atitangyonga kokteter."